

የሃኒሳ ፃፊዳ ኮይር ከታ ጌሉዋ

ዬሱሲ ከታዳ የሃኒሳ ፃፊዳ ኮይር ከታይ፡ ላዑ ሁጴ ቆጋቱዋ አይቆዳ፤ ሄዋንቱካ፡ ናባቢያዋንቶ ያሳናኔ እ ናዓ ዬሱሲ ከሪሰቶሳና አቲፔቱላይ ዴዓናዳን ማንጭላናሳኔ ሃ አቲፔቱላ ቆይሳናው ዳንዳይያ ዋርዶ ቲሚርቲያፔ አንቱንቱ ሃካና ማላ፡ ሚኒሲዴ አኩከሳናሳ። ሄ ዋዴ ዴንዴዳ ዋርዶ ቲሚርቲ «ኢታቱላይ ፑልቲያዌ ሃ ኑኒ ዴዒያ ዋልቃማ አላሚያና ጋኩቲያ ጋኩላና ጊዲያ ዲራው፡ ያሳ ናዓይ ዬሱሲ ሙሌካ አሳ ጊዳናው ዋይ፡ አሳቱላ ኤሻይ አው ዴዓናው ዳንዳይና» ያጊያዋ። ሄ አስታማራቱ፡ «አቶቱላ ጉሳይ አላሚያ ዴዑዋሲ ኤንዔቲያዋፔ ላዓ ኬሲያዋ» ያጊና። ሄዋ ቦላካ ቃሲ «ኢታኔ ኬካ ሻኪዴ አይቂያዋ ዋይ፡ ሃራ አሳው ሲቁዋ ቤሲያዋ ጊዶፔካ፡ አቶቱላና አንቱንታ ጋሲያባይ ባዋ» ያጊና።

ፃፊ ሃ ቲሚርቲያ ኤቁቲዳ፡ «ዬሱሲ ከሪሰቶሲ ፖሎ አሳ፤ ዬሱሳን አማኒያዋንቱኔ ያሳ ሲቂያዋንቱ ኡባይ ባሬንቱ ጊዶኒካ አቲ አቱዋና ሲቁታናው ቤሴ» ያጊዴ ኑዴዳ።

ሼምጋቱዋ ኡባቱዋሲ አሜቴዳ ቃንሳ ቆፋቱዋ

- ጌሉዋ (1:1-4)
- ፖዑዋኔ ቆማ (1:5-2:29)
- ያሳ ናናኔ ፃላሂያ ናና (3:1-24)
- ቱሙዋኔ ባሌሉዋ (4:1-6)
- ሲቁዋ ዋልቃንሉዋ (4:7-21)
- ዶኒያ አማኑዋ (5:1-21)

ዴዑዋ ቃላ

1 ኑኒ ኮዩሩዋፔ ዶሚዴ ዴዒያ፡ ኑ አዩፊያን ቤዒዴ፡ ኑ ኩሺያን አ ቦቺ ቤዔዳ ዴዑዋ ቃላባ ሂንቱንቶ ፃፊቶ። ኑኒ አ ቤዔዴ፤ ኑ ኩሺካ አ ቦቺ ቤዔዳ። 2 ሄ ዴዑ ቆንጨና፡ ኑኒ አ ቤዒዴ፡ አባ ሂንቱንቶ ማርካቲቶ፤ ቃሲ ያሳ አዉዋ ማታን ዴዒያ ኑሲ ቆንጨዳ ማዲና ዴዑዋባ ሂንቱንቶ ኑዴቶ። 3 ቃሲ ኑናና ሂንቱንቶ አቲፔቱላይ ዴዓና ማላ፡ ኑኒ ቤዔዳዋኔ ሲሴዳዋ ሂንቱንቶ ኑዴቶ፤

ኑሲ አወዋናኔ አ ናዓ ዩሱሲ ከሪሰቶሳና ኢቲፔቲላይ ዴዔ። 4 ኑኒ ኑ ናሼቻይ ፖሌታና ማላ፣ ሃዋ ሂንቴንቶ ፃፊቶ።

ፆሳይ ፖዑዋ

5 ኑኒ ፆሳ ናዓፔ ሲሲዴ፣ ሂንቴንቶ ኑዲያ ከታይ፣ «ፆሳይ ፖዑዋ፤ አኒ ጳማይ ሙሌካ ባዋ» ያጊያዋ። 6 ኑኒ ኑሲ አናና ኢቲፔቲላይ ዴዔ ጊዴ ጳማኒ ዴፆፔ፣ ኑ ሃሳያኒኔ ኑ ኑሱዋን ዋርዶቲቶ። 7 ሺን ፖዑዋን ኢ ዴዒያዋዳን፣ ኑኒካ ፖዑዋን ዴፆፔ፣ ኑሲ ኢቶ ኢቲዋና ኢቲፔቲላይ ዴዔ፤ ቃሲ አ ናዓ፣ ዩሱሲ ከሪሰቶሳ ሱሳይ ናጋራ ኡባፔ ኑና ጌሼ።

8 ኑኒ ናጋራ ኦሊቤይኮ ጎፔ፣ ኑሬካ ኑና ጩሜቶ፤ ኑናን ቱማቲላይካ ባዋ። 9 ሺን ኑኒ ፆሳው ኑ ናጋራ ፓፆፔ፣ ኢ ኑ ናጋራ አቶ ጋናወኔ ኑ ባዪዘ ኑሱዋ ኡባፔ ኑና ጌሻናው፣ አማኔቲያዋኔ ቱሙዋ ኦሊያዋ። 10 ኑኒ ናጋራ ኦሊቤይኮ ጎፔ፣ ፆሳ ዋርዶዋ ጌቶ፤ አ ቃላይካ ኑ ዋዛናን ዴዔና።

2

ከሪሰቶሲ ኑሲ ጋናቲያዋ

1 ታ ናቶ፣ ናጋራ ሂንቴ ኦሌናዳን፣ ታኒ ሃዋ ሂንቴንቶ ፆላይ፤ ሺን ኦኒኔ ናጋራ ኦሶፔ፣ አወዋ ማታን ኑሲ ጋናቲያ ዩሱሲ ከሪሰቶሲ፣ ዪሉ፣ ዴዔ። 2 ቃሲ ኑኒ ኑ ናጋራ አቶ ጌቲቲሳ ከሪሰቶሳ ባጋና ዴሜቶ፤ ከሪሰቶሲ ያርሼቴዳዌ አሳ ኡባ ናጋራ ዲጋናሳፔ አቲን፣ ኑ ናጋራ ፃላላ ዲጋናሳ ጊዴና።

3 ኑኒ ፆሳ አዛዙዋ ናጎፔ፣ ቱሙ አ ኤሪያዋ ሄዋን ሻካናው ዳንዳዬቶ። 4 ኢቲ ኡራይ፣ «ታኒ አ ኤራይ» ጊዴ፣ ቃሲ አ አዛዙዋ ናጌናን አጎፔ፣ ሄ ኡራይ ዋርዶዋ፤ ቱማቲላይካ አኒ ባዋ። 5 ሺን አ ቃላው አዛዙቲያ ኦና ጊዶፔኔ፣ ሄ ኡራይ ፆሳ ሲቁያዋ ቱሙ ፖሌቲዳ። ኑኒ ፆሳን ዴዒያዋ ሃዌ ኑና ኤሪሲ። ሄዋካ፣ 6 «ታኒ፣ ፆሳን ዴዓይ» ጊያ ኦኒኔ ከሪሰቶሲ ዴዔዳዋዳን ዴዓናው ቤሴ።

ኦራሳ አዛዙዋ

7 ታ ሲቃቶ፣ ታኒ ሂንቴንቶ ኮዪሩዋፔ ዴዒያ ኤጫ አዛዙዋ ፆላይፔ አቲን፣ ኦራሳ አዛዙዋ ፆሬኬ፤ ሄ ኤጫ አዛዙ ሂንቴ ሲሴዳ ቃላ። 8 ጊዶፔካ፣ ታኒ ሂንቴንቶ ላዒንሉዋ ኦራሳ አዛዙዋ ፆላይ፤ ሄ አዛዙዋ ቱማቲላይካ ከሪሰቶሳኒኔ ሂንቴናን ቤቴ። አዪሲ ጎፔ፣ ጳማይ ጳዬ፤ ቱሙ ፖዑ ሃዒ ፖዔ።

9 ፖዑዋን ዳዓይ ጊዳ፣ ባሬ አሻ ኢዲያ ኦኒኔ ሃኖ ጋካናሲካ ጳማኒ ዳዔ። 10 ባሬ አሻ ሰቂያ ኦኒኔ ፖዑዋን ዳዔ፤ ሄ ኡራን ሃራ ኡራ ጳቢያባይ ኣያይኔ ባዋ። 11 ሺን ባሬ አሻ ኢዲያ ኦኒኔ ጳማኒ ዳዔ፤ ጳማኒ ሃማቲ። ጳማይ ኣ ኣይፊያ ቆቂሲ ዋሌዳ ዲራው፣ ሃቃ ቢንቶኔ ኤሬና።

12 ታ ናቶ፣ ያሳይ ከሪስቶሳ ሱንላ ዲራው፣ ሂንቴ ናጋራ ኣቶ ያጌዳ ዲራው፣ ታኒ ሂንቴንቶ ያፋይ።

13 ኣዎቶ፣ ኮዩሩዋፔ ዳዒያዋ ሂንቴ ኤሬዳ ዲራው፣ ሂንቴንቶ ያፋይ።

ያላጋቶ፣

ዓላሂያ ካፑዋ ሂንቴ ያኔዳ ዲራው፣

ሂንቴንቶ ያፋይ።

ጉላ ናቶ፣ ያሳ ኣወዋ ሂንቴ ኤሬዳ ዲራው፣

ሂንቴንቶ ያፋይ።

14 ኣዎቶ፣ ኮዩሩዋፔ ዳዒያዋ ሂንቴ ኤሬዳ ዲራው፣

ሂንቴንቶ ያፋይ።

ያላጋቶ፣

ሂንቴ ሚኖ ጊዲያ ዲራውኔ

ያሳ ቃላይ ሂንቴናን ዳዒያ ዲራው፣

ቃሲ ዓላሂያ ካፑዋ ሂንቴ ያኔዳ ዲራው፣

ሂንቴንቶ ያፋይ።

15 ሃ ኣላሚያ ዋይ ኣላሚያን ዳዒያ ኣያኔ ሲቆፒቴ። ሂንቴ ሃ ኣላሚያ ሲቆፒቴ፣ ያሳ ሲቆ ሂንቴናን ባዋ። 16 ኣዩሲ ጎፔ፣ ሃ ኣላሚያን ዳዒያ ኡባባይ፣ ሄዋካ፣ ኣሳቴላ ኣሙ፣ ኣዩፊያን ያሊዳ ካጄሊያዌኔ ባሬ ዳዒያዋን ጨቁቲያዌ ሃ ኣላሚያፔ ዩዳዋፔ ኣቲን፣ ያሳፔ ዩቤና። 17 ሃ ኣላሚኔ ሃ ኣላሚያን ኣሳይ ኣሞቲያ ኡባባይ ኣቆና። ሺን ያሳይ ጌዳዋ ኦሊያ ኡራይ ሜጲናው ዳዓና።

ከሪስቶሳ ኤቁቲያዋፔ ናጌቲያዋ

18 ታ ናቶ፣ ዋዲያ ወርሴላይ ማታቴዳ፤ ከሪስቶሳ ኤቁቲያዋ ሲንላፔ ያናዋ ሂንቴ ሲሴዳዋዳን፣ ሃራይ ኣቶ ሃዒካ ኣ ኤቁቲያዋንቱ ጮራቱ ዳንዴዲኖ። ሄዋ ዲራው፣ ዋዲያ ወርሴላይ ማታቴዳዋ ኦኒ ሄዋን ኤሬቶ። 19 ሃ ኤቁቲያዋንቱ ኑ ባጋ ጊዳና ዲራው፣ ኑ ጊዶፔ ኬሴዲኖ፤ ኣዩሲ ጎፔ፣ ኡንቴንቱ ኑ ባጋ ጊዲያባ ጊዲንቶኔ፣ ኑ ጊዶን ዳዓና፤ ሺን ኡንቴንቱፔ ኦኒኔ ኑ ባጋ ጊዳናዌ ኤሬታና ማላ፣ ኑ ጊዶፔ ኬሴዲኖ።

20 ሺን ከሪስቶሲ ሂንቴ ቦላ ጌሻ ኣያና ጉሴዳ፤ ቃሲ ሂንቴ ኡባይ ቱሙዋ ኤሬታ። 21 ቱሙዋ ሂንቴ ኤሬያ ዲራውኔ ቃሲ

ቱሙዋን ዋርዲ አያይኔ ባዪናዋ ሂንቴ ኤሪያ ዲራው። ታኒ ሂንቴንቶ ፃፋይፔ አቲን። ቱሙዋ ሂንቴ ኤሪና ዲራው ፃፊኬ።

22 ዩሱሲ ኦኬቴዳ ኪሪሰቶሳ ገዲያዋ ኤሪኬ ገያ ኡራፔ አቲን። ዋርዲ ኦኔ? ሃዌ ፆሳ አወዋኔ ናዓ ኤሪኬ ገያዌ ኪሪሰቶሳ ኤቆቲያዎ። 23 ፆሳ ናዓ ኤሪኬ ገያ ኦናኔ ፆሳ አወካ ኤሪና፤ ፆሳ ናዓ ኤራይ ገያ ኦናኔ ቃሲ ፆሳ አወካ ኤሪ።

24 ሃዋ ዲራው። ኮዪሩዋፔ ሂንቴ ሲሴዳዋ ሂንቴ ዋዛናን ማኒሲዴ ናገቴ። ኮዪሩዋፔ ሲሴዳዋ ሂንቴ ናገቴ። ሂንቴንቶ ቃሲ ፆሳ ናዓናኔ ፆሳ አወዋና ኢቲፔቴላይ ዴዓና። 25 ቃሲ ኪሪሰቶሲ ባሬ ሁጴው ኮሲ ኢማና ጌዳዌ ሜጲና ዴዑዋ።

26 ታኒ ሃዋ ሂንቴንቶ ሄ ሂንቴና ባሌሌያ አሳቱዋ ዲራው ፃፋዲ። 27 ሺን ኪሪሰቶሲ ሂንቴ ቦላ ባሬ ጌሻ አያና ጉሴዳ። ጌሻ አያናይ ሂንቴናን ዴዒያ ዲራው። ኦኒኔ ሂንቴና ታማሪሳና ኮሺና፤ አዪሲ ጎፔ። አ ጌሻ አያናይ ሂንቴና ኡባባ ታማሪሴ። ኢ ታማሪሲያዌ ቱሙዋፔ አቲን ዋርዲዋ ገዴና። ሃዋ ዲራው አያና ጌሻ ቲማርቴው አዛዘቴዳ። ኪሪሰቶሳና ኢቲፔቴላን ዴዒቴ።

28 ታ ናቶ። ቃሲ ኢ ቆንጨያ ዎዳ። ኮኒ ያሺ ባዪናዋንታ ገዲናዳኒኔ። አ ዩሳ ጋላሲ አ ሲንላን ኮኒ ዩላቴናዳን። አናና ኢቲፔቴላን ዴዒቴ። 29 ኪሪሰቶሲ ዪሎ ገዲያዋ ሂንቴ ኤርፔ። ዪሎባ ኦሊያ ኡባይ ፆሳ ናዓ ገዲያዋ ኤራናው ቤሴ።

3

ፆሳ ናናቱዋ

1 ኮኒ ፆሳ ናናቱዋ ጌቴቲዳ ፃሴታና ማላ። ፆሳይ ኮና አይ ኬና ሲቆዳንቶኔ ቤዒቴ። ኮኒ ቱሙካ አ ናናቱዋ። ሃ አላሚ ፆሳ ኤሪና ዲራው። ኮናካ ኤሪና። 2 ታ ሲቃቶ። ሃዒ ኮኒ ፆሳ ናናቱዋ፤ ኮኒ አያ ሃናኔንቶ ቢር ኤሬቲቤና፤ ሺን ኪሪሰቶሲ ቆንጨያ ዎዳ። ኮኒ አ ማላታናዋ ኤሬቶ። አዪሲ ጎፔ። ኢ ቱሙ አ ገዲያዋ ኮኒ ኩሜንላን ቤዓና። 3 ቃሲ ኪሪሰቶሳ ቤዓና ገዴ ናሺቻን ናገያ ኦኒኔ ኪሪሰቶሲ ጌሻ ገዴዳዋዳን። ባሬና ጌሹ።

4 ናጋራ ኦሊያ ኡባይ ፆሳ ሂገያ ሜንሎ፤ አዪሲ ጎፔ። ናጋራይ ፆሳ ሂገያ ሜንሎ። 5 ኪሪሰቶሲ አሳ ናጋራ ቆንጨዳናው ቆንጨዳዋ ሂንቴ ኤሪታ፤ አኒ ናጋራይ ባዋ። 6 ኪሪሰቶሳን ዴዒያ ኦኒኔ ናጋራ ኦሊዴ ዴዒና፤ ቃሲ ናጋራ ኦሊዴ ዴዒያ ኦኒኔ አ ቤዒቤና ዎይ ኤሪቤና።

3:1 የህ 1:12 3:5 የህ 1:29

7 ታ ናቶ፡ ኦኒኔ ሂንቴና ባሌላፖ። ኪሪሰቶሲ ዲሎ ገዲያዋዳን፡ ዲሎባ ኦሊያ ኡራይ ዲሎ። 8 ፃላሂያ ካፑ ኮዩሩዋፕ ናጋራ ኦሌዳ ዲራው፡ ናጋራ ኡባ ዋዴ ኦሊያ ኡራይ ፃላሂያ ካፑዋሳ፤ ሄዋ ዲራው፡ ያሳ ናባይ ፃላሂያ ካፑዋ ኦሎዋ ቆዩሳናው ቆንጩዳ። 9 ያሳ ናናቱዋ ገዲያ ኡባይ ያሳ ሜዴታይ ኡንቴንቴን ዴዲያ ዲራው፡ ናጋራ ኡባ ዋዴ ኦሊኪኖ፤ ቃሲ ያሳይ ኡንቴንቴ ኣወዋ ገዲያ ዲራው፡ ናጋራ ኦላናው ዳንዳዩኪኖ። 10 ያሳ ናናቱዋ ገዲያዋኒኔ ፃላሂያ ካፑዋ ናናቱዋ ገደን ዴዲያ ዲማቴላይ ሃዋን ኤሪቴ፤ ዲሎባ ኦሊናዋንቴኔ ዋይ ባሪ ኢሻ ሲቄናዋንቴ ኦኒኔ ያሳ ናናቱዋ ገዲኪኖ።

ኢቱ ኢቱዋና ሲቄቲያዋ

11 ኣዩሲ ጎፔ፡ ኮዩሩዋፕ ሂንቴ ሲሴዳ ከታይ፡ «ኢቱ ኢቱዋና ሲቄታናው ቤሴ» ያገረዋ። 12 ኑኒ ቃዬላ ማላ ገደናው ቤሴና። ቃዬላ ፃላሂያ ካፑዋሳ፤ ሄዋ ገደ ዲራው፡ ባሪ ኢሻ ዋዴዳ። ኢ ባሪ ኢሻ ኣዩሲ ዋዴዳ? ኢ ኦሌዳ ኦሎ ኢታ ገዲና፡ ኣ ኢሻይ ኦሌዳ ኦሎ ሎባ ገዴዳ ዲራው ዋዴዳ።

13 ታናዳን ያሳ ካሊያዋንቶ፡ ሃ ሳባ ኣሳይ ሂንቴና ኢያፔ፡ ኦራላባ ጎፔ። 14 ኑኒ ኣማኒያዋንታ ሲቄያ ዲራው፡ ሃዩቁዋፔ ዴያ ፔኔዳዋ ኤሪቶ፤ ኣማኒያዋንታ ሲቄና ኡራይ ኦኒኔ ሃዩቁዋ ገደን ዴዴ። 15 ኣማኒያዋንታ ኢዲያ ኦኒኔ ሸምፑዋ ዋዴዳዋ፤ ቃሲ ሸምፑዋ ዋዴዳዋን ሜዲና ዴዴ ባዩናዋ ሂንቴ ኤሪታ።

16 ኪሪሰቶሲ ባሪ ሸምፑዋ ኑ ዲራው ኣሊዴ ኢሜዳዋን ሲቄ ኣዩንቶ ኑኒ ኤሪዳ፤ ኑኒካ ኣማኒያዋንቱ ዲራው፡ ኑ ሸምፑዋ ኣሊዴ ኢማናው ቤሴ። 17 ሸን ዴሪ ኣሳይ ኦኒኔ ባሪ ኢሻይ ሜቶቲያዋ ቤዲዳ፡ ኣው ቃሪቴናን ኢያፔ፡ ባሪ ዋዛናን ያሳ ሲቃይ ጋናው ዋኒ ዳንዳዩ? 18 ታ ናቶ፡ ኑኒ ኦሎዋኒኔ ቱማቴላን ሲቄቶይቴፕ ኣቲን፡ ጮ ሃሳያን ዋይ ቦላ ዶናን ሲቄታናው ቤሴና።

ያሳ ሲንላን ኣማኔቲዴ ኤቂያዋ

19-20 ኑኒ ቱሙዋ ባጋን ዴዲያዋ ሄዋን ኤራና፤ ቃሲ ኑ ዋዛናይ ኑ ቦላ ፒርዲያ ዋዴ ኡባን፡ ያሳ ሲንላን ቱማቴላ ኑና ሄዋን ኤሪሴ። ኣዩሲ ጎፔ፡ ያሳይ ኑ ዋዛናፔ ዋልቃማ፤ ቃሲ ኢ ኡባባ ኤሪ።

21 ታ ሲቃቶ፡ ኑ ዋዛናይ ኑ ቦላ ፒርዴናዋ ገደፔ፡ ኑኒ ያሳ ሲንላን ያዮኩ። 22 ኑኒ ኣ ኣዛዙዋ ናገያ ዲራውኔ ኣ ናሽቲያባ ኦሊያ ዲራው፡ ዋሲያ ኡባባ ኣፔ ኣኩቶ። 23 ያሳ ኣዛዙ ሃዋ፡ ኪሪሰቶሲ ኑና ኣዛዙዳዋዳንካ፡ ያሳ ናባ ዩሱሲ ኪሪሰቶሳ ሱንላን

ኑኒ አማናናዳኒኔ ኢቱ ኢቱዋና ሲቁታናዳን ያሳይ ኑና ኣዛዘዳ።
24 ያሳ ኣዛዘዋ ናጊያ ኦኒኔ ያሳ ጊደን ዴዔ፤ ያሳይካ ኣ ጊደን ዴዔ፤ ያሳይ ኑሲ ኢሜዳ ኣ ኣያና ባጋና ኢ ኑ ጊደን ዴዔያዋ ኑኒ ኤሬቶ።

4

ቱማንቻ ኣያናኔ ዋርዶ ኣያና

1 ታ ሲቆቶ፣ ያሳ ኣያናይ ታናን ዴዔ ጊያ ኡባ ኣማኖፒቱ፤ ሺን ኡንቱንቱን ዴዔያ ኣያናይ ያሳፔዬ ዋይ ጊዴኔንቶ ፓጨቱ። ኣዩሲ ጎፔ፣ ጮራ ዋርዶ ናባቱ ኡባሳ ቤዲኖ። 2 ያሳ ኣያና ጊዲያዋ ሂንቱ ሃዋን ኤራና፤ «ዩሱሲ ኪሪሰቶሲ ኣሳ ጊዲዴ ዬዳዋ ኣማናይ» ጊያ ኦናኒኔ ዴዔያ ኣያናይ ኡባይ ያሳፔ ዬ። 3 ቃሲ ኪሪሰቶሲ ኣሳ ጊዲዴ ዬዳዋ ኣማናይ ጌናዋ ኣያናይ ኡባይ ያሳፔ ዩቤና፤ ኣኒ ኪሪሰቶሳ ኤቁቲያ ኣያናይ ዴዔ። ሂንቱ ሃዌ ያናዋ ካሴ ሲሴዲታ፤ ኢ ሃራይ ኣቶ ሃዒካ ሃ ኣላሚያን ዴዔ።

4 ታ ናቶ፣ ሂንቱ ያሳዋንታ፤ ሂንቱ ጊደን ዴዔያ ጌሻ ኣያናይ ሃ ኣላሚያን ዴዔያ ኣያናፔ ዳር ዋልቃሚያ ዲራው፣ ዋርዶ ናባቱዋ ሂንቱ ዮኔዲታ። 5 ኡንቱንቱ ሃ ኣላሚያ ኣሳ ጊዲያ ዲራው፣ ሃ ኣላሚያባ ሃሳዩና፤ ሃ ኣላሚያ ኣሳይካ ኡንቱንቱ ሃሳያ ሲሴ። 6 ኑኒ ያሳዋንታ፤ ያሳ ኤሪያ ኦኒኔ ኑኒ ጊያዋ ሲሴ። ያሳ ኤሬና ኦኒኔ ኑኒ ጊያዋ ሲሴ። ኑኒ ቱሙ ኣያናኔ ዋርዶ ኣያና ሃዋን ሻኬቶ።

ያሳይ ሲቁዋ

7 ታ ሲቃቶ፣ ሲቁ ያሳፔ ዩያ ዲራው፣ ኣኒ ኢቱ ኢቱዋና ሲቁቶይቱ። ሲቁቲያ ኦኒኔ ያሳ ናና፤ ያሳካ ኤሪና። 8 ያሳ ኤሻይ ሲቆ ጊዲያ ዲራው፣ ሲቁና ኡራይ ኦኒኔ ያሳ ኤሬና። 9 ያሳይ ኑና ባሬ ሲቁዋ ሃዋን ቤሴዳ፤ ኑኒ ኣ ባጋና ዴዐ-ዋ ዴማና ማላ፣ ባሬ ኢቲ ናዓ ሃ ኣላሚያ ከቲዳ። 10 ሲቁዋ ጊያዌ ሃዋ፤ ያሳይ ኑና ሲቁዳ፣ ኑኒ ኑ ናጋራፔ ማሮቲፋ ዴሜዳ ባሬ ናዓ ኑሲ ከቲዳፔ ኣቲን፣ ኑኒ ኣ ሲቁዳዋና ጊዴና።

11 ታ ሲቆቶ፣ ያሳይ ኑና ሃዋዳን ሲቁዳዋ ጊዶፔ፣ ኑኒካ ኢቱ ኢቱዋና ሲቁታናው ቤሴ። 12 ያሳ ኦኒኔ ሙሉካ ቤዒቤና፤ ኑኒ ኢቱ ኢቱዋና ሲቁቶፔ፣ ያሳይ ኑ ጊደን ዴዔ፤ ኣ ሲቁካ ኑ ጊደን ፖሌቲዳ።

13 ያሳይ ባሬ ኣያና ኑሲ ኢሜዳ ዲራው፣ ኑኒ ያሳ ጊደን ዴዔያዋኔ ኢካ ኑ ጊደን ዴዔያዋ ኤሬቶ። 14 ያሳ ኣዉ ባሬ ናዓ ሃ ኣላሚያ ኣሺያዋ ጊዳናው ከቲዳዋ ኑኒ ቤዒዴ ማርካቲቶ። 15 ዩሱሲ ያሳ ናዓ ጊዲያዋ ማርካቲያ ኑ ጊዲዋኒኔ ያሳይ ዴዔ፤

አካ ያሳ ገደን ዴዔ። 16 ያሳይ ኑና ሲቁያዎ ኑኒ ኑ ሁጾው ኤሬቶኔ አማኔቶ።

ያሳይ ሲቁዎ። ሲቁዎን ዴዔያ ኦኒኔ ያሳ ገደን ዴዔ፤ ያሳይካ አ ገደን ዴዔ። 17 ኑ ዴዐ ሃ አላሚያን ከሪሰቶሲ ዴዔዳዎ ማላ ገዲያ ዲራው። ፐርዳ ጋላሲ ኑኒ ያዬና ማላ። ሲቁ ኑ ገደን ፖሌቲዳ። 18 ሲቁዎን ያሺ ባዎ፤ ጋሱካ ቱሙ ሲቁ ያሻ ኬሲ ኦሌ። ያሻይኔ ሙራይ ኢቲፔ ቢያ ዲራው። ያዬያ ኡራ ሲቁ ኩሚንሳ ገዴና።

19 ያሳይ ኮይሮ ኑና ሲቁዳ ዲራው። ኑኒ አ ሲቁዶ። 20 ኦኒኔ፡ «ታኒ ያሳ ሲቃይ» ገዴ ባሬ አሻ ኢያፔ፤ ኢ ዎርዱዎ። አዩሲ ጎፔ፤ ቤዔዳ ባሬ አሻ ሲቁናዌ ቤዔቤና ያሳ ሲቃናው ዋኒ ዳንዳዩ? 21 ቃሲ ከሪሰቶሲ ኑሲ አሚዳ አዛዙ ሃዎ፤ ያሳ ሲቁያ ኡራይ ባሬ አሻካ ሲቃናው ቤሴ።

5

ሃ አላሚያ ያኒያዎ

1 ኦኬቴዳ ከሪሰቶሳ ያገዴ፡ ዩሱሳ አማኒያ ኡባይ ያሳ ናና፤ ቃሲ ያሳ አወዋ ሲቁያ ኦኒኔ አ ናናቱዋካ ሲቁ። 2 ኑኒ ያሳ ሲቁያዋኒኔ አ አዛዙዋ ናገያዎን፤ ያሳ ናናቱዋ ሲቁያዎ ኤሬቶ። 3 አዩሲ ጎፔ፤ ኑኒ ያሳ ሲቁያዌ አ አዛዙዋ ናገያዎ፤ አ አዛዙካ ዴዎ ገዴና። 4 አዩሲ ጎፔ፤ ያሳ ናዓ ገዲያ ኦኒኔ ሃ አላሚያ ያናናው ዳንዳዩ፤ ኑኒካ ሃ አላሚያ ያናናዌ ኑ አማኑዋና። 5 ሃ አላሚያ ያናናው ዳንዳዩያዌ ኦኒ? ዩሱሲ ያሳ ናዓ ገዲያዎ አማኒያዎ ዓላላይ ያናና።

ከሪሰቶሳዎ ማርካቲዳዎ

6 ዪንቃታ ሃላናኔ ሃይቁዎ ሱላና ዩዳዌ ሃዎ፤ ኢካ ዩሱሲ ከሪሰቶሳ፤ ሃላናኔ ሱላና * ኢ ዩዳዎፔ ኦቲን፤ ሃላ ዓላላና ዩቤና። ጌሻ አያናይ ቱማ ገዲያ ዲራው። ሄዌ ቱማ ገዲያዎ ኢ ባሬ ሁጾው ማርካቲ። 7 አዩሲ ጎፔ፤ ሄዙ ማርካቲ ዴዒኖ። 8 ሄዎንቱ፤ ያሳ አያና፤ ሃላኔ ሱላ፤ ሃ ሄዛቱ ኢቱ ኢቱዎዎ ጳልቁኪኖ። 9 ኑኒ አሳይ ማርካቲያዎ አማኖፔ፤ ያሳይ ማርካቲያዌ አሳዎፔ ሎይሴ አዴ፤ አዩሲ ጎፔ፤ ያሳይ ባሬ ናዓባ ማርካቲዳ ማርካቲሳይ ሃዎ። 10 ያሳ ናዓ አማኒያ ኡራ ዎዛናን ሃ ማርካቲሳይ ዴዔ። ያሳ አማኔና

* 5:6 ሃላናኔ ሱላና፡ ዩሱሲ ሃ አላሚያ ዩዴ ዪንቃታ ሃላ ዓላላና ገዴናን ባሬ ሃይቁዎ ሱላን ዩዳ። ሄዎ ጉሳይ ኢ አሳ ኩሺያን ዓማቁቱሳ ዓላላ ገዴናን፤ ሃ አላሚያን ሃይቁዳ ጉሳ።

ኡራይ ኦኒኔ ያሳይ ባሬ ናዓው ማርካቴዳ ማርካቴላ አማኒቤና ዲራው፥ ያሳ ዋርዲዋ ጌ።

11 ሲሚ ማርካቴላይ ሃዋ፤ ያሳይ ኑሲ ሜዲና ዴቦ ደሚዳ፤ ሄዌካ እ ናዓን ዴዔ። 12 ያሳ ናዓይ ዴዔያ ኦሲኔ ዴቦ ዴዔ፤ ያሳ ናዓይ ባይና ኦሲኔ ዴቦ ባዋ።

ሜዲና ዴቦ

13 ያሳ ናዓ ሱንጻን አማኒያ ሂንቴንቶ ሜዲና ዴቦ ዴዔያዋ ሂንቴ ኤራና ማላ፥ ሃዋ ሂንቴንቶ ፃፋዲ። 14 ያሳይ ኮዪያዋዲን፥ አዪኔ ኮኒ እ ዋሶ፤ ኢ ሲሲያዋ ኮኒ ኤሪያ ዲራው፥ አ ሲንጻን ያዮኮ። 15 ኮኒ ዋሲያ ኡባን ኢ ሲሲያዋ ኤሮ፤ ኮኒ እ ዋሴዳዋ ኢ ዛሬዳዋ ኤሬቶ።

16 ኦኒኔ ሃይቁ ቤሴና ናጋራ ባሬ አሻይ ኦሊሺን ቤዖ፤ ያሳ ዋሳናው ቤሴ፤ ሃይቁ ቤሴና ናጋራ ኦሌዳዋንቶ ያሳይ ዴቦዋ አማና። ሃይቁ ቤሲያ ናጋራይ ዴዔ፤ ታኒ ሂንቴና ሄዋ ያሳ ዋሲቴ ጊኬ። 17 ባዪዞ ኦሱ ኡባይ ናጋራ፤ ሺን ሃይቁ ቤሴና ናጋራይ ዴዔ።

18 ያሳ ናናይ ኦኒኔ ናጋራ ኡባ ዋዴ ኦሌናዋ ኮኒ ኤሬቶ። አዪሲ ጎ፤ ያሳ ናዓይ አንቱንታ ናጌ፤ ቃሲ ፃላሂያ ካፑካ አንቱንታ ቆሃናው ዳንዳይና። 19 ኮኒ ያሳዋንታ ጊዲያዋኔ ሃ አላሚ ኡባይ ፃላሂያ ካፑዋን ሞዴቴዳዌ ኤሬቶ።

20 ኮኒ ቱሙ ያሳ ኤራናዲን፥ ያሳ ናዓይ ዬዳዋኔ ኑሲ አኬካ አሚዳዋ ኤሬቶ። ኮኒ ቱሙ ያሳ ጊዶን፥ አ ናዓ ዬሱሲ ኪሪሰቶሳ ጊዶን ዴዔቶ፤ ኢ ቱሙ ያሳኔ ሜዲና ዴቦዋ።

21 ታ ናቶ፥ ኤቃቱዋ፤ ሂንቴ ሁጲያ ናጊቴ።

Ooratha Caaquwaa New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source
files dated 29 Jan 2022
585b63ca-b8e6-55c8-bfef-10bdc95ad69c